



Mateo 26



Nadid éném
a aldew bagu
Piyesta na
Ala-ala, éy
dinumemét ti
Jesus ta Betania. Saya
i bariyua a nangbuhayan
na ni Lazaro. Ey ti
Maria, éy inalap na tu
esa a boti a memahal a
pulturida, a nibulak na to tikéd ni
Jesus, sakay pinahiden na to buk
na. Ey linumaganap tu sapot na
ta étanan a lubuk no bile.



Nadid ti Hudas Iskarote, a esa du labindalawa a
alagad, éy inumange siya du mataas
a padi, a monda itokyon na ti
Jesus dide. Ey du padi,
pékabati de to kagi na, éy
mésahat side. Ey kinagi de
diya a atdinan de siya ta
kuhata. Ey sapul
ta éya, éy
mégisip dén ti
Hudas ta
oras a
péngitokyon
na ni Jesus
dide.



Nadid, sinunud du alagad tu nibilin ni Jesus, sakay nihanda de tu péngapon de para ta Piyesta na Ala-ala. Nadid, to péngan de, éy inalap ni Jesus tu kanén de a tinapay, éy to pégpasalamat na ta Diyos, éy pinuseng-puseng na a nitagtag na du alagad na.

"Kanén moy dén ye," kagi na, "a saye i bégi kua."



3

Nadid, inalap na tu tasa a te lasén a alak. Ey to pégpasalamat na dén, éy nigewat na dide, a kinagi na, a "Inumén moy dén ye, sikam a étanan. Da saye i digi kua, a saye i tanda na pangako na Diyos. Ey mebulak alang-alang ta meadu a tolay. Saye i pégpatawad ta kasalanan na tolay."



4


Nadid, kinagi ni Jesus ni Simon Pedro, a "Simon, pinumilit dén ti Satanas, a monda puhubaan na kam ta mahigpit. Pero nipanalangin ta ka dén, Simon, monda éwan maibut tu péniwala mo diyakén.

Ey nadid, Simon, éng magsisi ka dén, a nagsoli ka dén diyakén, éy gustu ko éy patibayén mo tu péniwala du kakaguman mo."



5

"Anin, Panginoon," kagi ni Pedro, "éwan maibut tu péniwala ko diko. Maski ipihesu de kita a bunon de kita, éy éwan ta ka ginanan!" "Ewan, Pedro," kagi ni Jesus. "Da tandaan mo, bagu magtarakot tu tandang nadid a amulaldew, éy tanggianék mo ta péntélo a éwanék mo kaguman."



6


Nadid, kinuyog ni Jesus du alagad na ta Getsemani. Ey kinagi na dide, a "Mégiknud kam pa se, a manalaginék ta dumanég a sae."

"Améng," kagi na, "maari ka a magimet ta maski anya. Iadeyo mo pad diyakén i paghirap ko. Pero éwan na kaluuben kua i masunuda, éng'wan na kaluuben mo I masunud."




7

Kanya nadid, éy nigiya na sa du sundalu sakay du pulis, a négsolo side ta bombilya sakay sulo a kayo. Sakay te armas be side. Side du inutusan du mataas a padi sakay du Pariseyo. Ey tulos tu esa dide a tinegpas na tu utusan no mataas a padi, a tulos minahipas tu talinga na. Pero sinaway ni Jesus du alagad na, a "Tama dén," kagi na, "diyan moy side harangan!" Ey tulos kembilan na tu talingo no utusan, éy mahusay dén!




8

Nadid, éy dinikép de ti Jesus, a niange de siya to bile no mataas a padi. Ey tinonod-tonod side ni Pedro. Ey nadid, to harap no bile no padi, éy nagdukot side ta apoy. Ey nékiagum ti Pedro du mégeknud sa, a nékipagdengdeng be sa siya.



9


Nadid, te bataan sa no mataas a padi. Top siya no lélake a tinegpas ni Pedro tu talinga na. Ey kinagi na ni Pedro, a "Isip ko neta ta ka be sa ta halamanan a kaguman na dinikép mia?" Pero inéwan man dén ni Pedro. Ey to péngawan na dén éy bigla a nagtarakot tu tandang. Ey to pékaala-ala ni Pedro ta éya, éy linumuwas siya, sakay nagsanget siya ta mahigpit.



10


Nadid, du étanan sa a te tungkulin a Judeo, éy niange de ti Jesus ni Gubernador Pilato. Ey ti Pilato, pékabati na ta éya, éy kinagi na ni Jesus, a "Anyá, siko i haria du Judeo?" Ey "O," kagi ni Jesus, "kona to kinagi mo." Ey gustu ni Pilato a légsiwan na ti Jesus; kanya nékipégpasuway man dén

siya du Judeo. Pero kinékagi de san ta medegsén, a "Ewan, ipako mo siya ta kudos! Ipako mo siya ta kudos!"




11

Kanya niatéd ni Pilato ti Jesus dide, a ipako de ta kudos. Ey pinaluwas de ti Jesus ta banuwan a békle na tu kudos na. Niange de siya ta lugar a ngéngahinan de a "Bungu" (ta kagi na Judeo éy Golgota).




12

Ey du sundalu, éy nipako de sa siya to kudos. Sakay nipako de be sa i éduwa a lélake a nitolnék de ta magtembanga a tagirilan ni Jesus.



13

Ey nadid, tu kortina a dikél ta lubuk no Templo, éy bigla a napéknet a nahati dén. Ey dinumulaw nadid ti Jesus, a kinagi na, a "Améng, ientarega ko diko i kaliduha kuae." Ey to pégkagi na dén ta éya, éy tulos na dén nahéngsatan.



14

Ey to giapon, éy dinumemét sa ti Hose a taga Arimatea. Siya éy sakup du konsiyal na Judeo, a iyégalang siya du tolay. Sakay inumasa be siya ta kédemét na Diyos a maghari.

Ey nadid éy éwan siya mésanike a umange ni Pilato a mékiohon diya éng makaalap siya to bangkay ni Jesus.

15

Ey namugtong pa ti Hose to manta a damit a pagsapot. Sakay pineogsad na dén tu bangkay to kudos, sakay sinaputan na to manta, sakay nielbéng na siya to kuweba a ginimet de to pader.

Sakay nigulung de tu bito a nitakléb de to pintuan no lébéng.

16

Nadid, to gagabi dén a sabadu, du mataas a padi sakay du Pariseyo, éy inumange side ni Pilato. "Gubernador," kagi de, "natandaan me tu kinagi na éya a mebuli a lélake to kébuhay na pabi, a mabuhay kan siya a huway

makalipas i étélo a aldew."

"Kanya nadid, inumange side to lébéng, sakay dinétonan de ta tanda tu takléb na a bito, sakay pinabantay de tu lébéng, monda masiguru de a éwan tu mékialam to bangkay ni Jesus."

17

18

Nadid, kélipas no pangilin, a simba dén a amulaldew, éy inumange ti Maria Magdalena to lébéng, sakay tu esa a Maria. Ey kédemét de sa, éy bigla a linumindul ta mesibét, a tulos dinumibi i esa a anghel a gébwat


ta langet.

Siya éy nigulung na tu bito a takléb no lébéng, sakay inumeknud sa siya. Ey du sundalu a mégbantay sa, namégpég side ta anteng de to anghel, a tulos natumba side a koman side i pate.

19


20

Nadid, kinagi no anghel to éduwa a bébe, a "Diyan kam méganteng. Tukoy ko a ahayukén moy ti Jesus, siya a nipako de. Pero éwan se siya," kagi na, "da nabuhay dén a kona to kinagi na. Kamon se, entan moy i lébéng naa."



21

Nadid, pékabati du bébe ta éya a kagi no anghel, éy agad side hinumektat to lébéng. Sakay nagingan side a nibaheta de du alagad i nanyaria. Ey méganteng side a mésahat. To pégingan de, éy sinambat side ni Jesus, a binati na side. Ey inumadene side a kinébkében de i tikéd naa, sakay sinumamba side diya.




22

Katapusana, éy pinumeta ti Jesus du sapulu éy ta esa a alagad na to péngan de. Ey pinékgagian na side, da éwan side naniwala diya, sakay éwan side naniwala du nagbaheta dide a buhay dén siya. Nadid, to pégkagi ni Jesus dide, éy inumontok siya ta langet, a kaguman na dén sa i Diyos a méghari.

23

Juan 3:16
Mahal na Diyos a tahod i tolay ta mundua. Kanya pinaange na se tu anak na a isesa, monda maski ti ésiya i maniwala diya, éy éwan mate, éng éwan mabuhay a éwan tu katapusan.



54 60 24

Taga Roma 3:23 Dahilan éy te kasalanan i étanan a tolay, kanya éwan side makaadene ta Diyos.

Taga Roma 6:23 Dahilan i keangayana na makasalanan a ugali éy kamatayan. Pero i kaluub na Diyos éy buhay a éwan tu katapusan. Ey gébwat ya ta Panginoon tam a Cristo Jesus.

Hebreo 9:27 Tukoy tam a mensan san a mate i tolay. Sakay kétapos na éya, éy hukumén na Diyos.

Taga Epeso 2:8,9 Kanya meligtas kam éy dahil ta kabaitan na Diyos, sakay ta péniwala moy ni Cristo. Ewan kam meligtas dahil ta gimet moy a sarili, éng'wan gébwat ya ta kaluuben na Diyos.

Kanya éwan makapagpalalo i maski ti ésiya a meligtas siya dahil ta gimet na a mahusay.

25

Taga Roma 10:9,10 Eng ipagtapat mo a ti Jesus éy Panginoon, sakay éng méniwala ka a tahod a binuhay siya na Diyos to lébéng, éy meligtas ka a talaga.

Dahilan, éng méniwala kitam a talaga, éy tanggapén kitam na Diyos, a ibilang na kitam a éwan tu kasalanan. Eng ipagtapat tam a siya i Panginoon tam éy meligtas kitam.

Juan 3:16,17 Mahal na Diyos a tahod i tolay ta mundua. Kanya pinaange na se tu anak na a isesa, monda maski ti ésiya i maniwala diya, éy éwan mate, éng éwan mabuhay a éwan tu katapusan.

Ewan pinaange na Diyos tu anak na ta mundua a maghukum ta tolay, éng'wan magligtas ta tolay.

26

1 Juan 5:11-13 Ey saye i katunayana na Diyos: inatdinan na kitam ta buhay a éwan tu katapusan. Ey i buhay a éya éy gébwat ta anak na.

Siya a nipasakup ta anak na Diyos éy te buhay a éwan tu katapusan. Ey siya a éwan nipasakup ta anak na Diyos, éy éwan siya tu buhay.

Nadid, i sulat ko a éye éy para dikam a méniwala ta anak na Diyos. I isulat ko a éye dikam, éy monda mapospusan moy a talaga a te buhay kam a éwan tu katapusan.

27

Mateo 26-28; Lukas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen.

Casiguran Dumagat Agta Bible (dgc) © 1979, Wycliffe
Bible Translators, Inc.

<https://www.bible.com/bible/1170/MAT.1>

©2024 Bible for Children, Inc.

www.M1914.org

www.bibleforchildren.org

28